



**REPUBLIKA E SHQIPËRISË  
BANKA E SHQIPËRISË  
KËSHILLI MBIKËQYRËS**

**V E N D I M**

**Nr. 39 datë 25.05. 2011**

**PËR MIRATIMIN E RREGULLORES  
“PËR EKSPORT-IMPORTET E KARTËMONEDHAVE E TË MONEDHAVE METALIKE  
SHQIPTARE”**

Në bazë dhe për zbatim të nenit 34 dhe nenit 43, shkronja “c” të ligjit nr.8269, datë 23.12.1997 “Për Bankën e Shqipërisë”, i ndryshuar; me propozimin e Departamentit të Emisionit, Këshilli Mbikëqyrës i Bankës së Shqipërisë,

**VENDOSI :**

1. Të miratojë rregulloren “Për eksport-importet e kartëmonedhave dhe të monedhave metalike shqiptare”, sipas tekstit bashkëlidhur këtij vendimi.
2. Vendimi i Këshillit Mbikëqyrës të Bankës së Shqipërisë nr. 83, datë 07.11.2001 “Për miratimin e rregullores “Për eksport-importet e kartëmonedhave e të monedhave metalike shqiptare”, shfuqizohet.
3. Ngarkohet Departamenti i Emisionit për zbatimin e këtij vendimi.
4. Ngarkohet Departamenti i Marrëdhënieve me Jashtë, Integrimit Evropian dhe Komunikimit, për publikimin e këtij vendimi në Buletinin Zyrtar të Bankës së Shqipërisë dhe në Fletoren Zyrtare të Republikës së Shqipërisë.
5. Kjo rregullore hyn në fuqi 15 (pesëmbëdhjetë) ditë pas botimit në Fletoren Zyrtare të Republikës së Shqipërisë.

**SEKRETARI**

**Ylli MEMISHA**

**KRYETARI**

**Ardian Fullani**

**BANKA E SHQIPËRISË**  
**KËSHILLI MBIKËQYRËS**

**RREGULLORE**  
**“PËR EKSPORT–IMPORTET E KARTËMONEDHAVE DHE TË MONEDHAVE METALIKE SHQIPTARE”.**

(Miratuar me vendim nr.39, datë 25.05.2011 dhe ndryshuar me vendimin nr. 50, datë 31.07.2013 të Këshillit Mbikëqyrës të Bankës së Shqipërisë dhe me vendimin nr. 66, date 01.12.2021 të Këshillit Mbikëqyrës të Bankës së Shqipërisë)

**KREU I**

**DISPOZITA TË PËRGJITHSHME**

**Neni 1**

**Objekti i rregullores**

Objekti i kësaj rregullore është përcaktimi i sasisë dhe procedurave për eksport–importin e kartëmonedhave dhe monedhave metalike shqiptare, me ose pa kurs ligjor.

**Neni 2**

**Baza ligjore**

Kjo rregullore miratohet në bazë dhe për zbatim të nenit 34 të ligjit nr. 8269, datë 23.12.1997 “Për Bankën e Shqipërisë”, i ndryshuar.

**Neni 3**

**Përkufizime**

Në zbatim të kësaj rregulloreje, termat e mëposhtëm kanë këtë kuptim:

- a. “Monedhë” - janë kartëmonedhat dhe monedhat metalike shqiptare me ose pa kurs ligjor,
- b. “Monedhë me “Kurs ligjor” - janë kartëmonedhat dhe monedhat metalike të emetuara nga Banka e Shqipërisë të cilat nuk janë tërhequr nga qarkullimi dhe që shërbejnë si mjet pagese e pranohen për të gjitha pagesat e detyrimeve që individët ose subjektet e ndryshme, private ose publike, kryejnë me njëri tjetrin.
- c. “Monedhë pa “Kurs ligjor” - janë kartëmonedhat dhe monedhat metalike shqiptare të cilat janë tërhequr nga qarkullimi dhe që nuk mund të shërbejnë si mjet pagese për pagesat e

detyrimeve që individët ose subjektet e ndryshme, private ose publike, kryejnë me njëri tjetrin.

- d. "Cash" - është gjendja fizike e monedhave, që eksportohen dhe importohen fizikisht në territorin e Republikës së Shqipërisë.
- e. "Eksport" - është nxjerrja në cash, nga territori i Republikës së Shqipërisë, i kartëmonedhave dhe e monedhave metalike shqiptare, me ose pa kurs ligjor.
- f. "Import" - është futja në cash, në territorin e Republikës së Shqipërisë, e kartëmonedhave dhe e monedhave metalike shqiptare, me ose pa kurs ligjor.
- g. "Person" - është **individ, personat fizikë tregtarë dhe personat juridikë**<sup>1</sup> sipas kuptimit që i jep neni 26 i Kodit Civil të Republikës së Shqipërisë.
- h. "Individ" - kupton çdo shtetas, shqiptar ose të huaj, rezident ose jorezident në Republikën e Shqipërisë.
- i. "Veprimtari numizmatike" – është mbajtja e kartëmonedhave ose monedhave metalike me ose pa kurs ligjor, për qëllime koleksionimi dhe/ose studimi.

## KREU II

### IMPORTI DHE EKSPORTI I MONEDHAVE

#### Neni 4 E drejta ekskluzive

Importi cash i monedhave shqiptare me kurs ligjor, është e drejtë ekskluzive e Bankës së Shqipërisë.

#### Neni 5<sup>2</sup> Import–eksporti

1. Çdo person, ka të drejtë të eksportoje ose të importojë në cash monedha shqiptare me ose pa kurs ligjor nga/në territorin e Republikës së Shqipërisë.
2. Në çdo rast, personat zbatojnë detyrimet për deklarimet pranë autoriteteve doganore në kufi sipas përcaktimeve në legjislacionin për parandalimin e pastrimit të parave dhe financimit të terrorizimit”

---

<sup>1</sup> Ndryshuar me vendimin nr. 66, date 01.12.2021të Këshillit Mbikëqyrës të Bankës së Shqipërisë

<sup>2</sup> Ndryshuar me vendimin nr. 66, date 01.12.2021të Këshillit Mbikëqyrës të Bankës së Shqipërisë

### **Neni 6<sup>3</sup>**

#### **Eksporti nga Banka e Shqipërisë për përshtatjen e makinave të përpunimit të monedhës**

1. Banka e Shqipërisë, për përshtatjen e makinave të veta të përpunimit të monedhës, kryen eksport të monedhave shqiptare.
2. Eksporti sipas pikës 1 të këtij neni, bëhet me urdhër me shkrim të administratorit përkatës.
3. Urdhri sipas pikës 2 të këtij neni, bazohet në relacionin e përgatitur nga Departamenti i Emisionit në Bankën e Shqipërisë. Në çdo rast, autorizimi përmban gjithashtu edhe sasinë e monedhave që do të eksportohet.

### **Neni 7<sup>4</sup>**

Shfuqizuar

### **Kreu III**

#### **DISPOZITA TË FUNDIT**

### **Neni 8**

Shfuqizime

Rregullorja “Për eksport – importet e kartëmonedhave e të monedhave metalike shqiptare”, e miratuar nga Këshilli Mbikëqyrës i Bankës së Shqipërisë me vendimin nr. 83, datë 07.11.2001, shfuqizohet.

### **Neni 9**

Hyrja në fuqi

Kjo rregullore hyn në fuqi 15 (pesëmbëdhjetë) ditë pas botimit në Fletoren Zyrtare të Republikës së Shqipërisë.

**KRYETARI I KËSHILLIT MBIKËQYRËS**

**Ardian Fullani**

---

<sup>3</sup> Ndryshuar me vendimin nr. 66, date 01.12.2021 të Këshillit Mbikëqyrës të Bankës së Shqipërisë

<sup>4</sup> Shfuqizuar me vendimin nr. 66, date 01.12.2021 të Këshillit Mbikëqyrës të Bankës së Shqipërisë